

Mengenang MH370: 'Sesuatu yang kita perlu terima, walaupun sukar' - Tun M

Astro Awani

08 Mac 2023

Fareez Azman

KUALA LUMPUR: Kehilangan pesawat Malaysia Airlines MH370 masuk tahun kesembilan hari ini.

Misteri kehilangan pesawat yang membawa 239 penumpang dan kru itu terus menjadi persoalan, terutamanya dalam kalangan ahli keluarga penumpang.

Ia turut menarik perhatian bekas perdana menteri Tun Dr Mahathir Mohamad yang memberi reaksi dalam satu perkongsian di akaun Facebook mengenai kejadian yang menimpa pesawat malang itu.

"Hari ini ulang tahun kehilangan MH370, sejak itu kita tidak mendapat bukti sebenar apa yang berlaku terhadap pesawat terbabit. Ramai yang mengatakan ia terhempas di laut.

"Tetapi kita tidak mempunyai bukti nyata pesawat itu terhempas ke laut, kita juga tidak ada bukti yang mengatakan MH370 mendarat atau terhempas di mana-mana kawasan darat," jelasnya.

Tambah Dr Mahathir, tempoh sembilan tahun amat panjang buat ahli keluarga penumpang pesawat itu serta meresahkan apabila mereka tidak mengetahui apa sebenarnya berlaku pada pesawat berkenaan.

"Jadi, ini amat meresahkan keluarga penumpang kerana mengetahui sesuatu berlaku kepada ahli keluarga mereka adalah satu kelegaan.

"Tetapi tidak mengetahui apa yang berlaku kepada ahli keluarga mereka sangat mengganggu kerana kita tidak tahu sama ada mereka masih hidup atau telah ditangkap.

"Jadi, kita perlu bersabar. Kita harus menerima bahawa kejadian ini telah berlaku. "Kita tidak mahu ia berlaku, tetapi ia telah berlaku dan kita harus menerima kenyataan bahawa pesawat ini telah hilang bersama penumpang dan anak kapal," jelasnya lagi.

Ujar Dr Mahathir, beliau turut berdoa agar usaha mencari pesawat itu membuahkan hasil, namun jika yang sebaliknya berlaku, ia pastinya sesuatu yang sukar namun tetap perlu diterima.

"Kemungkinan besar mereka tidak lagi bernyawa kerana apabila pesawat itu diambil alih oleh orang lain dan diterbangkan ke destinasi lain, nasib penumpang pastinya akan menjadi seperti pesawat itu.

"Apa yang berlaku kepada kapal terbang, berlaku kepada penumpang.

"Saya berdoa dan berharap kita dapat terus mencari pesawat itu.

"Tetapi jika kita tidak dapat mencari pesawat selama bertahun-tahun, kita harus menerima hakikat bahawa kita telah kehilangan mereka.

"Kita telah kehilangan pesawat itu dan kita telah kehilangan ahli keluarga yang terbang di dalam pesawat itu.

"Itu adalah sesuatu yang perlu kita terima, walaupun sukar," kata Tun Mahathir lagi. Misteri kehilangan pesawat Malaysia Airlines MH370 bermula apabila ia hilang dari radar ketika penerbangan dari Lapangan Terbang Kuala Lumpur (KLIA) ke Beijing pada 8 Mac 2014.

Bagaimana dan mengapa pesawat canggih Boeing 777 yang membawa 227 penumpang dari pelbagai negara dan 12 anak kapal itu hilang tanpa dapat dikesan radar terus menjadi teka-teki sehingga ke hari ini, di sebalik pencarian besar-besaran yang pernah dilakukan dalam sejarah penerbangan.

© 2023 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/mengenang-mh370-sesuatu-yang-kita-perlu-terima-walaupun-sukar-tun-m-409842>